

**SEVENTH LEGISLATIVE ASSEMBLY OF MIZORAM
(SIXTH SESSION)**

LIST OF BUSINESS

FOR FIRST SITTING ON TUESDAY, THE 7th JULY, 2015
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu LAL THANHAWLA** to make obituary references on the demise of the following dignitaries :
 - 1) **Brig. T. Sailo** former Chief Minister of Mizoram.
 - 2) **Pu Lalnghenga**, former MLA of Mizoram.

PRESENTATION OF REPORT

2. **THE SPEAKER** to present to the House the Sixth Report of Business Advisory Committee.

PRESENTATION OF BUDGET

3. **Pu LALSAWTA, MINISTER** to present to the House :-

Vote on Account 2015-2016 (August-October, 2015) with allied papers.

NGURTHANZUALA
Secretary

....

SPEAKER : Pathian zawng, a kawng chu a tha famkim a; Lalpa thu chu fiah a ni tawh. Amaha rinna nghat zawng zawngte tan chuan ani chu phaw a ni.

(Sam 18:30)

Awle, waviin hi thil tihur pawimawh danglam tak kan nei a. Session hnuhnungber leh waviin session inkarah hian keimahni ang bawka he House-a rorel ve tawh thin pahnih Pu T. Sailo leh Pu Lalnghenga te chatuana he ina rorel tawh lo turin min kalsan ta a. Chumi te sunna hun chu kan hmang dawn a, an chanchin ngaihthlakna kan nei hmasa ang a. Kan House Leader hi a awmlo a nih chuan a aiawh Deputy House Leader kan sawm ang a. An pahnih chanchin hi tum khatah sawi mai se hun a duh rei loh nan. Tunah kan Deputy House Leader kan lo sawm ang.

Kan hotute pahnih Pu Thenphunga Sailo, Chief Minister hlui leh Pu Lalnghenga, MLA hlui te chanchin ngaihthlakna kan Leader of the House Pu Lal Thanhawla hnen atangin ilo nei ang u.

Pu LAL THANHAWLA, CHIEF MINISTER : Pu Speaker, waviinah kan House zahawm taka kan member thin Chief Minister meuh lo ni tawh obituary reference sawi ngai hi paw ka ti hle a; MLA zahawm tak Pu Nghenga a lo ni bawka a, a vanduaithlak ka ti a.

A hmasa in Chief Minister hlui Brig. Thenphunga Sailo chungchang hi kan sawi hmasa ang a Pu Speaker.

Brig. Thenphunga Sailo hi ni 27.3.2015 chhun dar 11:55 khan lung natna avangin kum 93 mi niin a boral a ni. Brig. Thenphunga Sailo hi Thuampui khaw lal Vanchheuva Sailo leh Pi Hrangvungi te fapa neihchhun a ni a. January ni 1, 1922 khan Lunglei Melkhat khuaah a lo piang a; Sailo lal ho inthlahchhawn danah chuan a pa thih hnua lalna chelh ve nghal tur a ni.

Brig. Thenphunga Sailo hi Pi Thansiami D/o P.S. Dahrawka nen kum 1946 September ni 17 khan an innei a, fapa pathum leh fanu pakhat an nei a, tu pakua leh tu chhuan pakhat an nei a ni.

Brig. Thenphunga Sailo hian kum 1932 khan Lunglawn Primary School atangin Primary a zir zo va. Hemi hnu hian Mizoram chhim lama Middle English School awmchhun Serkawn Baptist Mission School-ah kal leh in Middle School pawh tha takin a zo leh a. Kum 1940-ah Shillong Government High School atangin Matric First Division-ah a zo leh a, kum 1941 khan Serampore College, Calcutta-ah Intermediate Science a zir zawm a, hetia zirna lama nasa taka inhman a tum mek lai hian Indopui pahnihna kha a lo thleng ta tlat mai a. An zirtirtu sap hote pawh sipaiah an lut ta nual a. Ani pawh a zirlai zo hman lovin 1942 khan King's Commission-a lutin sipaiah a tang ve ta a. Training a zawh veleh

Burma-a Japan lo lut thla dangtu pawlah thawn chhoh nghal a ni a. A ruka che pawl 'The Chin Levies' zawmin huaisen takin hna a thawk a. Hna a thawh that em vangin Burma Front-ah hian tum hnih ngawt a hran ve vea tirh chhoh a ni a. Sipai huaisente chawimawina 'Mention in Despatch' pawh tum hnih ngawt a dawng a ni.

1944-ah Assam Regiment a zawm a, Burma lamah awm thinin 1947-ah India ramchhungah alo lut leh a. Zofate zinga sipai Officer hmasa ber niin 1960-ah Lt.Colonel-ah a kai a; 1963 khan Colonel-ah a kai leh a, September 1966-ah Brigadier-ah a kaisang leh a ni. Mizo zinga brigadier kai hmasa ber a ni. Kum 1971 khan Bihar leh Orissa (Odisha) Sub-Area-a Command a lak lain nasa takin tui a lian a, hetah hian mipuite chhanchhuahna hna a thawh that em vangin sipai officer ten chawimawina sang an dawn thin AVSM (Ati Vishisht Seva Medal) a dawng a ni. 1973 December ni 31 khan a hnathawhna lama hmingtha takin a pension ta a ni.

Brig. Thenphunga Sailo kaihhrainain 1974 June thla khan Human Right Committee din a ni a. He pawl hian nasa takin hna a thawk a. Mizo mipuiten an thlamuanpui hle a, a theih ang angin mipuite thlavang a hauh a. He pawl hnathawh avang hian Mizorama India sipaite hleilenna chu hmuh theihin a kiam ta duak a. Ama ho bawkin 17th April, 1975-ah political party pakhat Peoples' Conference din a ni a, president-a thlan nghal a ni. Mizote tan theihtawp chhuaha an thlavang a hauh lai hian MISA (Maintenance of Internal Security Act) danin man a ni a, Nowgong special jail-ah thla sawm chung a tang a, March 1977-ah an rawn chhuah leh a. 1977-ah P.C.Party ticket-in Member of Legislative Assembly atan Aizawl North Constituency atangin thlan tlin a ni a, ni 3 June, 1978-ah Chief Minister atan lak luh a ni. Mahse hemi tum hi chuan kum chanve emaw awrh chauh sawrkarna an chelh hman a ni.

Kum 1979-ah Assembly inthlan thatnaah P.C. party chuan hnehna chang lehina tum hnihna atan Chief Minister a ni leh ta a. Brig.Thenphunga Sailo hi vawi 5 lai MLA a thlan tlin a ni. Kum 1978, 1979-ah Aizawl North Constituency atangin thlan tlin a ni a. 1984-ah Buarpui Constituency; 1998-ah Mamit Constituency; 2008-ah Aizawl West-III atangin thlan tlin leh a ni. Pu Thenphunga Sailo hian hmasawna a vei em em a, heng buh leh thlai tharchhuaha intodelh, tui in tur tam tak neih, kawlpheha tam tak siam chhuah, inbiakpawhna leh inkalpawhna tha neih, thlawhna, rel leh motor kawngpui tha siam leh thingtlang lam tihhmasawn nan te hian a theihtawpin hma a la a ni. Mizoram pawhin kan hlawkpui hle a ni. 1999 khan sawrkar laipuiin Padma Shree lawmman a hlan a ni.

Brig.Thenphunga Sailo nat dan chu, ni 27 December, 2014 khan lung lam that lohna avangin a thaw a hah a, New Life Hospital-ah dah luh a ni a. Doctor ten theihtawp chhuaha an enkawl hnuah a that chhoh ve deuh avangin ni 12 February, 2015 khan damdawi in a chhuah san a, that lam pawh a pan chho ve zel a. Ni 27 March, 2015 dar 10:30 vel khan a chau ta thut a, Ambulance-in New Life Hospital pan pui a ni a. Doctor leh

Nurse ten theih tawp chhuaha an enkawl hnuin chhun dar 11:45 khan chatuan ram min pan san ta a ni.

Brig. Thenphunga Sailo a thi tih hriat a nih veleh Mizoram sawrkar pawhin a ui hle a, half holiday-ah a puang a, hnam puanzar a ngul chavea zarin ni thum chhung a sun bawk a ni. Tin, Mizoram Gazette-ah Black Boarded Obituary tihchhuah nghal a ni.

Pu Speaker, kan hriat theuh angin Pu Thena hi Mizo fate zingah chuan sipai officer lian hmasa ber a ni a. Brigadier pheih chu amah chiah kha rei tak kan neih chhun a ni a, a hnu ah hian Brig. Vankunga kan nei a, a hnuah kan la nei leh ta lo a ni. Chutianga mi hmasa leh mi ropui a ni a. Tin, sipai atanga a lo chhu ah hnuin Mizoram buai nasa takin a vei a. Sipaiten an tih loh tur tam tak an ti a, Armed Forces Special Power Act te misuse-na a tam nasa a. Chungte chu rawn veiin Mizoten kan rights kan hriat theihna turin Human Right Committee-te a din a. Chumi atang chuan nasa takin sipai ho inhrawtna nasa lutuk te vengin theihtawp a chhuah a. Tin, a hnu ah party-ah an let a, Peoples' Conference Party an din ta a. Chuta tang pawh chuan theihtawpin remna leh muanna zawngin a hote nen an thawk a. Tichuan, 1978-ah an lo sorkar a, keipawh hemi tum hian Opposition Group Leader ka ni a. Tin, anmahni chhungkuaah buaina, harsatna an tawh avangin thla 6 emaw vel lek hnuah President's Rule-ah central sorkarin, Pu Desai a te khan min dah ta a. Tichuan, 1979-ah inthlanna a lo awm leh a, chutah pawh chuan an tling leh a, Chief Minister a lo ni leh a, keipawh hemi tum hian Opposition Group Leader kan ni ve leh a ni. Chutiang chuan ram rawngbawlna chungchangah pawh House pawnah leh House chhungah ngaihdan inan loh chang awm mahse ram leh hnam tan kan lo thawk ho thin a.

Tin, a upat hle hnuah House-ah thlan leh niin he House-ah ngei hian a hun tawp dawn lamah farewell speech ropui tak a deliver nghe nghe a, chu chu Zoram mipuiten kan la hria a ni. Chutiang chuan, a hun tawp thlengin ram leh hnam tan, Zoram tan a ngaihtuahna te, a hun te a hmang a. Tichuan, a lo damloh hnu pawh hian vawi 2/1 chu kan hmu ve a. A ngaihtuahna te Zoram tan a chawl lo tihte pawh a hriat theih a. Tiang chuan, Zoram tan chauh nilo, India tan nasa taka a hun tha te a hman hnuin, hetiang hian kan lo chan ta a ni.

Dam rei hi Pathian malsawmna ropui tak dawnna a ni a. Ani pawh kum heti zat min dampui thei hi Pathian malsawmna nasa tak a dawng a ni tih a lang thei a. A hnathawh leh India ram tana a thawhte leh Zoram tana a thawhte leh a hmalakna te Zoram mipuiten kan hre reng dawn a. Chuvangin, vawiinah helai hunah, House zahawm takah amah hriatrengha leh sunna hun kan han hmang hi lungchhiat thlak hle mahsela hetiang mi ropui Zofate zinga kan nei hi lawmawm ka ti a. Vawiinah hian a nupui fanau te, a tu leh fa te, chhungkhat laina thisen zawmpui zawng zawngte kan hre reng a. Kan tawngtaina ah pawh an chhungkaw chungchang leh a kalsante tan Pathianin thlamuanna dik tak a pek theihna turin kan hria a ni.

Vawiinah helaiah hetiang mi ropui sunna kan lo nei ta hi thil runthlak tak a ni. Amaherawhchu, mihring kan nih avangin hun tawp kan nei lo thei lova, hetiang House-ah ropui taka sun a ni thei te pawh hi Pathian malsawmna ropui tak a ni tih ka'n tarlang duh a ni. Pu Speaker, ka lawm e.

SPEAKER : Pu Nghenga chanchin pawh kha sawizawm nghal mai rawh hun a duh rei loh nan.

Pu LAL THANHAWLA, CHIEF MINISTER : Ka lawm e, Pu Speaker. Nia, pahnih an nih avangin kan lak kawp hian nakina sawi leh tur kan hotute zingah an awm pawhin a remchang ang tih ka ring a.

Pu Lalnghenga, Ex-MLA hi ni 29th June, 2015 tlai dar 3:30 khan zunthlum leh B.P. hniam thut avangin New life Hospital ah kum 71 mi niin a boral a ni. Pu Lalnghenga hi Upa Thangzika Tochwawng leh Darneihkhawli te fa 6 zinga naupang ber niin ni 2nd January, 1944 khan Saichal khuaah a piang a. Ratu khuaah a seilian thung. Saichal atang hian kum 1952 ah Ratu-ah an pem. Pu Lalnghenga hi Pi Lianhliri D/o Vansanga(L) nen kum 1965 khan Ratu biak inah an innei a, fapa pathum leh fanu pakhat an nei a, tu pasarih leh tuchhuan pathum an nei a ni. Pu Lalnghenga hi lehkha thiam thei tak a ni a. Primary School chu Ratu-ah a kal a. Kum 1961-ah Matric chu St.Paul's High School atangin 1st Division-ah a pass a. P.U. Science hi St.Anthony's College Shillong atangin a pass a. Kum 1965-ah B.A. Part-I English (Hons) chu D.M. College Imphal atangin a zo leh a. Pu Laldeng'an (L) MNF zawm turin a sawm a, B.A. zo hman lovin kum 1966-ah MNF chu a zawm ta a ni. Vawi engemaw zat chu Remna Palai hna thawkin Government of India nen inbiakna ah a tel a ni.

Kum 1972 October khan man a ni a, phai Jail-ah rei tak a tan hnu-ah Tuirial Special Jail-ah sawn a ni. Kum 1978 January-ah bail a chhuah a ni. Kum 1980-ah Aizawl College atangin B.A. a zo va, kum 1982-ah M.A.(English) NEHU Mizoram campus atangin a zo leh a ni. Sawleng High School-ah inhlawhin a thawk a, kum 1991-ah Pachhunga University College-ah guest lecturer-in a thawk a, chumi hnuah Aizawl West College-ah a thawk leh a, senior lecturer-in a pension a ni.

Kum 1979-ah Mizoram Assembly Election ah N.Vanlaiphai Constituency atangin P.C. ticket-in a ding a, a tling zo lova. Kum 1982-ah By-election-ah N.Vanlaiphai Constituency atang tho hian thlantlin a ni.

Pu Lalnghenga hi pa tawng tam lo, a tawng chhuah chhun erawh rintlak leh pawmtlak tak a ni. Mi zaidam leh inkiltawih thin tak, a tih lohna erawh tih luih har tak a ni thung. Khawtlangah mi tangkai tak niin MNF party ticket-in Village Council-ah thlantlin a ni a, VCP-ah term khat awmin, hemi hnu hian Aizawl Municipal Council hnuiaia Local

Council inthlanah khan ZNP ticket-a thlantlin leh a ni. Khawtlang thatna turin a tha leh zung theih tawpachhuah mi a ni. Zonuam Presbyterian Kohhranah lawiin rawngbawltu, Pathianni chawhnu sermon, committee peng hrang hranga chanvo chang leh puitling sunday school zirtirtu hlun a ni a, a thih ni thlengin he a rawngbawl hna hi a chelh a ni.

Pu Lalnghenga hi mi hrisel tak a ni thin a, mahse zunthlum natnain a tlakbuak ve a, kum 2013 August atangin a khel ruh nuam lo a sawisel tan a. Kum 2014 January khan New Life Hospital-ah admit a ni a, February ni 8, 2014 khan zai a ni. Hemi hnu hian damdawi in atanga luh leh chhuah a fawm reng a ni. A natna hi khawl hmanga endik a nih hnuah zunthlum bakah mit a lungte awm, kal tha lo, Pneumonia te hmuh chhuah a ni a. 27th April, 2015 khan thawhah avangin damdawiin ah luhpui leh a ni a, hemi tum hian ICU ah dah luh a ni. June thla chawhma lam khan New Life Hospital-ah admit leh a ni a, 25th June khan a BP a hniam thut avangin ICU ah dah luh a ni a, hemi hnu hian 29th June tlai dar 3:30 PM khan chatuan ram min pansan ta a ni.

Pu Lalnghenga hi he House zahawm takah hian member kan nih ho piah lamah mimal tak pawhin kan inhre tha hle a. Ram buai laiin an hotuten Mizoramah an lo tir thin a, Aizawla an lo luh te pawhin kan inhmu thin a, a tul ang angin kan theih chhun tlem mahsela ka lo tanpui ve thin a, chutianga inhre tha tak chu kan ni.

Tin, helaia kan sawi tawh ang khan lehkha thiamthei tak leh inzir mi tak a ni a, khatiang khan private-a a tih chhoh hnuin leh a theih ang anga tan a lak hnuin, College-ah zirtirtuah a tang a, chumi a tannaah pawh chuan thahnem a ngai hle a, an college tana hmalakna thenkhat khat leh tanpui ngai ni a a inhriatnaah te vawi hnih vawi thum kan in hmu nghe nghe a ni. Chutiang chuan in hre tha tak kan ni. Amaherawhchu vanduaithlak takin a damlo tih te kan lo hre hranpa lo a, hetiang hian min lo kalsan ta a ni tih hi Assembly Secretariat-in obituary reference min rawn pekah hian ka hre chauh nghe nghe a, chutiang chu a ni a, paw ka ti hle a. Vawinah hian he House member a mi tangkai tak pahnih, pakhat zawk phei chu Chief Minister hial lo ni tawh, Mizo tlangvalah chuan kan chhuanvawr te zing ami leh Pu Nghenga, House member zahawm tak lo ni tawh, takna, dikna a khat a ni a, hmui dawthei pulo mi a ni tih hi ka hria a. Chuvangin mi rinawm tak, mi dik tak, takna ngaina mi a ni a. Chuvangin chung lam malsawmna pawh a dawng nasa hle a ni. Hetianga min lo kalsan ta mai hi a uiawm tak zet a, he House tan chauh nilo, rampum tan channa rapthlak tak a ni. A nupui, a fanau te, a tu leh fa te, a kalsan a chhungte zawng zawng Pathianin thlamuanin awmpui se tih hi kan duhna a ni e. Ka lawm e.

SPEAKER : Awle, Opposition Group Leader, Pu Zawma i sawm ang.

Pu VANLALZAWMA : Pu Speaker, ka lawm e. Kan House Leader zahawm takin a sawi tak ang khan vawinah hian he House hian mi pawimawh tak leh danglam tak mai pahnih sunna hun kan hman a lo ngai ta a. Opposition group lam aiawhin

kan ui takzetin, an chhungte, an laina te kan tuarpuiin, Pathianin a awmpui zel ang tih kan ring a ni tih kha kan sawi hmasa duh a.

Kan House Leader-in a sawi tawh ang khan Pu Thena hi, (Pu Thena ka ti mai thin a, ani pawhin a pawl ti lo hian ka hria a, a changin ‘ka pu’ te ka’n ti a) politics lamah mi pawimawh tak Mizoram-a kan hriat reng tur a ni a. Chief Minister a nih tawh loh hnu ah pawh kum tam tak ram tan a ngaihtuahna a hmang thin a. Thu tam tak a sawi ngai lo a, mahse a sawi hi chu awmze nei leh fiah takin a sawi thin a. Midanglam tak a nih chu a chanchin, chanchinbuah te, media lam atang te pawhin kan hre tawh a, kang kha sawi lan vek a ngai lo a.

Vawiina ka’n sawilan duh lawk chu, kum 86 mi a nihin he House-ah hian member a la ni a, mipuiten ram hruai turin an la thlang tling a, kum 91 a nih thlengin he House-ah hian a thu a ni tih kan hre tlang a, hetiang hi kan awm leh thei ang em tih chu zawhna lian pui a ni a. Awm leh thei ta ila a duhawm hle ang a, amaherawhchu kan awm leh thei tawh lo ang tih pawh thil hlauhawm tak a ni tih kha ka’n sawi duh a.

Tichuan, kan hriat angin a hun hmasa lamah chuan Pu Thena hi sipai officer a ni a, sipai officer a nih chhungin a hnuaiah Mizo tam tak an thawk a, thawk chiah lo te pawh a kaihhraina leh a hriat phak chin deuh awmte pawh an awm a. Ka sawi ve fo thin, mak ka tih em em chu Chief Minister-a nih lai khan Shillong-ah lehkha zirin kan awm thin a, khatah khan Madanriting lam te khu chu sipai bang deuh hlir kha an ni a, ka zawt mai mai thin a. ‘Sipai bangah hian Pu Thena ngaisang lo hi in tlem awm mang e aw’, ka ti a, ‘kan awm lo ang’, an ti a. A thenin, ‘awm ve bawk ang, an ti a’. A lan danah kha chuan a hnuai lo thawk tawh zawng zawng sipai hian an zahin an ngaisang ni hian ka hria a, chu chu a danglamna tak a ni. Kan hotu tam tak hi ti ta ila, Department enkawltu tam takte hi an hoten an ngaihsan mang loh leh an hote zatve velin an rel an rel hi kan tam em em a ni. Pu Thena hi chu a hnuai lo thawk tawh leh sipaia a lo kaihhruai tawh ho hian Pathian tluk deuhthaw hian an ngai ti ila kan tisualin ka ring lo. Chuti khawpa midanglam chu a ni a. Chutih lai chuan tawngkam thlum leh thluaithlum vak chi ni bawk silo a mak khawp mai a, khati tak maia mi danglam kha a ni tih kha vawiinah sawilan thain ka hria a.

Tin, politics a khelh tawh hnuah pawh thu a thluaithlum ve vak ngai lo a, tul a tih kha a sawi mai a. Tin, an party policy Six Basic Needs a tih te phe chu tun thleng hian a lehpek hi a awm thei tak tak tawh chuang lo a. Tupawh hi sawrkar ila kha tho ah khan kal a ngai a, chutiang chu awmze nei deuhin he ram, he House hi min lo chhawpchuah sak a ti ila kan tisual awm lo e, chutiang mi chu a ni a. Tin, a Chief Minister tawh loh hnu pawhin tum khat chu MP kan nih ve tawh hnu khan, ‘ka lo zin dawn Delhi ah, (NDA sawrkar lai kha a ni a) Prime Minister hmuh ka duh a, appointment lo siam rawh, nang pawh i kal ve ang,’ min lo ti ringawt mai a, engmah dang sawi pawh awm lo. Tikhan ka thiam ang tawh tawkin lehkha te ka siam ve a. Prime Minister Vajpayee khan a duh hun tak kan va ziahah

khan a lo pe nghal thlap mai a, a mak hi ka ti angreng khawp mai a. Tin, a hnung ka va zui a, chutah pawh chuan thian inkawm hian a va kawm nghal mai thei a, appointment a hmu awlsam kha mak ka ti a. Tin, an inkawm dan boruak te nen khan an in close hle ni khan ka hria a. Chungte chu vawiinah hian han sawilan ve hrim hrim pawh thain ka hria a. Prime Minister Vajpayee nen khan mumal takin an inhmu tih ka hriatpui a, thu tam tak a sawipui a. Tin, Mizoram chungchang te a sawipui a, tiang khan tha deuhin hun a lo pe a, tiang khan kan Prime Minister kalta te pawh khan an ngaipawimawh em em a ni tih kha ka'n sawi duh a.

Tin, Zoram alo chhuah hlima a thil tih pakhat tun hnua han zin kual a ka thil hriat pakhat ka zawt a, chu mi min chhang fel hman ta lo erawh chu tun thleng hian a ngaihdan hi ka hre fuh ta lo a, pawl ka ti khawp a. Khawbela kan kal tum khan an khawtlang hruaituten min lo hrilh chu, “Chhingchhipah khawm kan ni a, kan khua hi kan vaiin kan chhuk vek a, amaherawhchu mahni khua a haw leh theih an han tih khan awmze nei deuh leh tlema khawsa thei deuh kha chu kan chho leh vek a an ti. Amaherawhchu rethei lutuk vanga let leh thei lo in 10 vel an awm a. Chhingchhipah chuan chung ho chu kum 10 a ral leh chuan kan tluk tawh lo vek a ni” tih hi min lo hrilh a ni. Chu mi chu Pu Thena hi ka zawt ta a, ‘thil dang tam tak i policy leh i tih zawng zawng hi tha ka ti, mahse khaw khawm khaw tlem te awm a, develop mai thei Mizoram khatia kal darh leh zawng tura i rawn ti hi chu,’ ka ti a. Min chhang dawn tan a, a sawi a, tum a nei tih chu ka hria a, mahse min chhan fel hmian Kanan veng a MUP ho sawm rual zet hi amah kawm tur hian an lo lut a, min chhang ta lova. Kha tak kha, thildang zawng zawngah hian a policy, a programme tih zawng zawng hi a tha, mahse khalai tak kha a tih chhan min hrilhfiah hmian a hnua hun remchang kan nei leh hleithei tawh lova, chhan kha chu a nei tih ka hria a, khalai min hrilhfiah hman lo hi chu tun thleng hian ka ngaihtuahnaah hian a awm thin a, enge khatia a rawn tih chhan. Dik tak chuan ram dangah te hnathawkin a awm nasa a, khawvel kalphung a hre Chiang a, he laia a policy pawh ti khan a rawn kalpui a, tun thlengin a la tha a, ‘khaw kawm’ ? a rawn tih let lehna chhan min chhang ta lo kha tun thleng hian ka rilruah a awm a. Ka sawi thin a, chu chu a chanchina han tihlan ka duh pawimawh em em pakhat a ni a.

Kan hre vek a, politics a awm kan ni a, House member zahawm tak tak te, khaw tereuh te te thlenga develop a ngai a, engkim an mamawh a, hall, kawng tha leh field an mamawh a. Khatiang zawng zawng han ngaihtuah khan khaw tlem te kan awm a kan darh leh lai a kha tam takin an sawi thin leh Khawbel ho in min lo tihna atanga kha zawhna kan siam min chhang mumal hman ta lo erawh chu tun thleng hian a uiawm ka ti a.

Engpawhnise, hruaitu ropui a ni a, he House-a a awm ve pawhin; tin, khawiah pawh awm se nelawm angreng tak, zahawm deuh hian a awm thiam reng mai tih kha kan hmuh dan, kei ka hriat ve dan a ni a. Vawiinah hian a uiawm tak zetin ka hria a. He House-

in kan ui chu thurban, Zoram mipui hian kan uiin kan chan nasa a, chutih mek lai chuan khatiang hruaitu ropui Pathianin he ram, he hnam a lo pe hi kan vannei hlein ka hria.

Tin, Pu Nghenga chungchangah tawi te han sawi rik ve leh ka duh deuh a awm a. A chanchin ka hre tam lova, amaherawhchu, kan hotute ka han biak kual khan Pu Nghenga chungchangah hian sawi tur engemaw chu an nei a. Tuna kan party President Pu Zoramthanga nen hian DM College-ah English (Hons) la dun an ni a. Tichuan, buai kum khan chhungkaw harsatna avangin a inhlawhfa zawk a, a rawn thleng chho hman ta lo a, rambuain a nang a, ramhnuaiah a tlan chhuak ta a. Pu Zoramthanga erawh chu BA exam zovin a tlan chhuak ve ta kha a lo ni a. Tin, ramhnuaiah pawh House Leader-in a sawi ang khan tangkai tak a ni a. Pu Zoramthanga min hrilh dan chuan, '1971-ah khan Bangladesh-a kan hotute thurel angin Shillong-ah remna palai hna thawk turin Pu Nghenga nen min tir chho a, chu chu remna bul tanna te pawh hi niin ka ring,' a ti a, official taka a intanna chu a ni reng a.

Shillong-ah chuan RWA-a an Deputy Director Pu Nghenga nen an han hmu dun a. Tichuan remna tura hmalakna hi khatiang atang khan a intan a ni e, tih kha a sawi a. Chungah chuan he remna leh muanna kan neihna kawngah pawh hian a bul tantu tak takah khan Pu Nghenga hi a sawi theih a. Tin, a chanchin an sawi leh kan hriata ka ngaihsan em em chu Jaila a tan lai khan mithiam a lo ni bawk a, a thawhpuite leh a tanpuite ho kha lehkha a zirtir a, ama zarah a chanchina kan hmuh ang khan, mi panga laiin Matric an passed a ni. Tin, amah pawhin ti hian a zir zui a.

Tin, College ah khan kan thawk ho hman a, kan thawhhona a pawimawh em em chu, nichina kan ngaihthlak tawh ang khan sap-tawng thiam a ni a, memorandum leh engemaw sorkar a theluh tur hi a draft tu a kan hman loh pawhin a lo final-tu ah te kan hmang a, MCTA ang pawhin a thiamna kha kan hmang tangkai thin khawp a ni tih kha waviinah hian puan chhuah thain ka hria a. Hetiang mi uiawm tak he House-in kan chan rualin, keini Opposition group lam pawhin kan uiin an chhungte zawng zawng kan tuarpui takzet a ni tih ka'n sawi duh a ni. Pu Speaker, ka lawm e.

SPEAKER : Wawiina kan sun tur zinga pakhat Brig T. Sailo hi chu he House Leader lo ni tawh a ni a, chuvangin sawi tur dang kan awm chuan hun i hawn belh mai ang.

Lt.. Col. Z.S. ZUALA : Pu Speaker, ka lawm e. Brig. Thenphunga Sailo, AVSM hi reilote a hnuaiah ka sipai tan laiin ka awm a, chumi a ka hmuh leh a chanchin han sawi loh hi a uiawmin ka hria a. 1960 khan 4th Bn. Assam Regiment hi a din a. Chu mi a din zawh chuan 1962-ah kum khat leh thla tlemte training an neih hnu khan Chinese aggression kan tih, 1962-a NEFA-a chho tur khan a Batallion 4th Assam Regiment kha an ti a. Chuan, khatih lai Airfield Chhabua a an awm lai khan Batallion dang, khiti lai front a kal tur awm ve hote zingah khan ani chuan tlawmngaih chhuahin, 'keini chu Hill Tribe kan ni a, hemi

tlang ramah hi chuan kanrawn vak chho mai ang, batallion dang hi thlawhtheihnaah kal rawh se' a ti a, Tichuan anni kha Hailiang panin kein an chho a, thlawhtheihnaa chuang chho ho kha Chinese te nen khan an inbei a, tam tak an thi a, amaherawhchu vanneithlak takin a hote kha an him a ni. Engemaw ti kawng zawng tak chuan a sipaite nunna a chhanhim sak a ni. Kei chu a battalion-ah ka awm chiah lo na a, mahse kha kha a thil tih ropui pakhat a ni a, Pathian hruaina pawh a ang khawp mai. Assam Regiment Centre-ah khan reilote a hnuaiyah ka awm a, chumi a ka hmuh chu a mah kha mi tak a ni a, min kaihhruainah khan tih mai mai hi a awm lo reng reng. Tin, ani hi a dik em em mai a, Assam Regiment Centre Commandant-in Happy Valley-ah a awm a, a fate Shillong-ah school-te an kal a, tumah sorkar motor-in a hruaitir ngailo reng reng. Ke in an kal mai, a nih loh chuan private motor, chu chu a tih dan a ni a. Kha kha a dik em emna tilangtu a ni a. Tin, Brigadier a kai a, a farewell speech-ah chuan kan Assam Regiment Senior Record Officer khan a sawi a, "Ani anga mi rinawm leh reliable hi ka la hrawn ngai lo" a ti a. Chu chu keimahni Regiment mi pawh a ni lo a, regiment hrang hrangah te a kal kual a, general service in a remark a ni a. Keipawhin ka hmuh dan chu kha kha a ni a. Tin, nichina kan Opposition Leader-in a sawi ang deuh khan, Assam Regiment bang ho reng reng khan PC. party a han din hnu pawh khan a party kha an zawm deuh vek a ni. Keipawh ka lo chhuah khan, " Pu Thena party i zawm mai dawn lo em ni?" min ti a. Kei kha chuan zawm mai pawh chu ka lo sawi lem lo a. Kha kha a military leadership tilangtu a ni a. Sipai kaihhruaia alo hrual nek tawh ho khan an ban hnu pawh khan an la zui ta cheu kha, kha khan a dik tak chu a show niin ka hria a. Chuvangin, ani hi mi tak tak, Mizo zinga mi ropui berte zing ami a niin ka hria a, tawi tein ka'n sawi ve a ni e, ka lawm e.

SPEAKER : Pu Thanliana.

Pu LALTHANLIANA : Pu Speaker, Brig. Thenphunga Sailo sunna thu sawi ve tura hun tha duhsakna min pek avangin ka lawm e. Committee-ah khan sawi ve ngei tura tih ka nih avangin ka lo inbuatsaih a. Ka huphurh khawp mai a, amaherawhchu theihpatawp ka'n chhuah ang e.

A chanchin tlangpui pawimawh zual, ka hriat ve lem loh te pawh official thil te kha chu kan ngaithla tawh a, sawi ka tum tawh lo a. Amaherawhchu, tun hunah hian Brig. Thenphunga Sailo sunna thu ka sawi rualin a nuna hun a lo paltlang tawh, ka rilrua ka ngaihsan leh ka rilru khawihtu te, tin entawntlak ka tih zual deuh deuh tlem azawng tihlan ka duh mai bakah amah hrechiang lemlo te pawh an awm thei a. Tunge a nih chiah a, eng ang mize pu chiah nge a nih tih te tlem azawng tal an hriat belh theihna turin tun hi hun remchangah rawn lak ka duh a. Amah a in sawi dan ni lo, miten a chungchang an sawina atangin tlem azawng rawn tarlan ka duh bawh dawn a ni.

Ram leh hnam a hmangaih zia a lanna nia ka hriat chu Pu Speaker, (tun hunah hian ka nervous deuh hlek a min lo hrethiam dawn nia, mahni pute chanchin kan sawi dawn

a). Mizoram a buai avangin Mizo mipuiten harsatna nasa tak kan tuar a, chumi chu a lo ziaawm theihna turin Mizo mipuite thlavang nasa takin a hauh a, kawng hrang hrangin hma a la a ni. Chutianga Mizo fate tana hna ropui tak a thawh mek lai chuan sipai hotu leh India ram sorkar hotute lung a tiawi ta tlat lo mai a. “A pension hmaa General kai thei tur kha a kaisan theih loh phah ta a ni e” an ti a. General dinhmun ropui tak mai pawh thlahlel hleithe lovin, Mizo mipuite harsatna nasa tak kan tawrhna atanga min chhanchhuah a duh avangin Brigadier chauh niin a rawn pension phah ta a ni. Hemi bakah hian a mizia kan hria a, mi tawng tam lo, mahni thil tih pawh uanpui vak vak lo mi a ni chungin Chief Minister a nih lai hun a sawi, ziaka ka hmuh han tarlan ka duh a awm a.

“Hmasawna atana pawimawh tak tak pahnih, kawlphehtha leh inkalpawhna lama lungphum ka lo phum ve hi chu ka lung a awi hlah hlah a ni. Ka lawmna ber chu Mizoram thatna tur atana theihtawp a ka thawk kha a ni a. Ka thawk nasa a, ka thawk nasa takzet a ni, nikhatah darkar 4 atanga darkar 5, ka muthilh hun, chaw ka ei hun leh ka inbual hun tih loh hun dang, darkar 18 atanga 19 hi chu hnathawh nan ka hmang a ni” a ti a. Hei hi a entawntlak a, a fakawm ka ti em em a.

Gen. Bhagdat-an Brig.T.Sailo Annual Confidential report a peka a ziahah chuan, “Sipai rinawm leh zep hni hne nei lo, a ngaihdan pawh huai taka sawi chhuak ngam mai mi, a tih tur bi tuk chu fel taka ti mai, mi ngainatawm leh dik taka thil ti mi, thudik sawi a ngaih avanga tawrh a ngaih dawn pawha tawrh zawk mai duh. Taksa chak tha tak mai, hna rim taka thawk mi. A hnuaia thawkte pawh chutianga ti ve zel tura beisei tlat mi a ni a. Eng hunah pawh thil a nihna tak sawi lang tura rin ngam a ni” tiin a ziaak a.

Ni 23rd March 1999-a President of India, K.R.Narayanan-an civil mi, mipui vantlang tana hnathawh thate chawimawina sang, Padma Shree a hlan tuma an pek chhan an ziah lan chu hetiang hi a ni. “Mizo mipuite rahbeh-a an awmna laka chhanchhuak turin a thawk nasa em em a, Chief Minister a nih chungin economics lama Mizoram mahnia a intodelh theihna tura hmasawna ruangam pawimawh hmasa pahnih kawlphehtha, Mizoram lui te atanga siamchhuahna atana hmalaknaah te. Tin, inkalpawhna hmanraw chi hrang hrang motor kawng, thlawhna kawng, rel kawng leh lui hmanga bungruate thiarna ang chi atana hmalakna kawngah nasa takin a thawk a ni” tih hi a inziak bawk a.

Central Power Minister, Ghani Khan Chowdhuri-an 7th January 1982-a Bairabi hmuna a thusawi chu “kan Chief Minister-te zingah mi pakhat chiah a state tana kawlphehtha neih theihna tura tihtakzet rilru pu mi ka hmu ta hi, thinlung takin ka va han lawm em. India rama state zawng zawnga Chief Minister zawng zawngte hian amah hi entawnah neih sela chuan India ram history hi ava han danglam nasa dawn em” a ti tih hi a inziak a. Tin, kum 2001 July thla a Mizorama politician leh sorkar hnathawkte corrupt lo ber hmuchhuak tura Mizo Zirlai Pawl-ten opinion poll an laknaah khan Mizoram politician-te zinga corrupt lo berah thlan chhuah alo ni a. Certificate pawh hlu tak thuziak mawi tak

keng an pe a. Tin, 2011-ah Vanglaini chanchinbu-in Mizo-te zinga mihmingtha leh Mizo-te tana hnathawk tha ber thlanna an neihah khan thlanchhuah a lo ni bawk a. Nichin khan kan ngaithla a, kum 91 thleng helaiah hian a thu a. Khawvelah hian Legislator hetiang a thu thei upa ber a ni mai awm e.

Hetianga taka mi chhuanawm leh mahni tih tur tlin taka hlenchhuak zel thin mi, Mizote zingah chauh pawh ni lo, hnamdang zingah pawh a awmna apianga mite ngaihsan leh ngaihhlut mi. Tin, thil hriat reng tlak a tha zawnga hnutchhiah zel thei mi, mi rintlak leh mi taima, mi thiltithei Mizo fate zinga kan nei hi a vanneihthlak ka ti em em a ni. Pathianin talent danglam tak mai, mi hneh theihnate, nichinah kan ngaithla a, thiltitheihna te, hna thawhtheihna te, a bakah Mizoram hmasawna tur atana hmahlir thui tak a neihte hi i hre reng ang u. A chhuanawm ka ti a, hei hi a ropuina niin ka hria a. Mizorama milar leh mipuitling tak tak, sakhaw mi, sakhaw rawngbawltute mai bakah a hunlaia politics a ama opposite a awmte thlengin amah an ui thu leh an ngaihsan thu an ziak kan en khan Brig. Thenphunga Sailo hi chu kan lo uin kan lo ngaisang takzet a ni tih a hriat theih a. A hlu ka ti takzet a, a lawmawm takzet a ni.

Mizoram People's Conference party founder President a ni a, MPC party-te chuan kan chhuangin kan ngaisang em em a ni. Chatuan ram min lo pansan ta mai hi Mizoram mipuite tan channa nasa tak a niin ka hria a. Keini a kaihhruai MPC party te tan leh lek pheih chuan channa nasa tak a ni a. Kan ui em em a, kan theihngilh dawn lova, kan hre reng dawn a ni. Kan tan pheih chuan kan kungpui a tliak a ni ringawt a ni. Ka tan tak pawh Brig. Thenphunga Sailo hi channa nasa tak a ni a. Amah avangin vawiinah helai Mizoram rorelna sang berah hian ka thut theih phah a, a chungah ka lawm em em a ni. A nuna thil tha entawn tur awm zawng zawngte hi Zoram mipuite hian entawn thei ila ka duh ngawt mai. A kalsan tak a nupui, a tu leh a fate, a hmangaih te, amah hmangaihtu te, a laina te, a thisen zawmpui zawng zawng thinlung takin ka tuarpui em em a. Pathianin thlamuan zel se tih hi an tana ka duhsakna sang ber a ni. Ka lawm e.

SPEAKER : Pu Zoram Sangliana.

Pu P.C. ZORAM SANGLIANA : Pu Speaker, tawitein kan ram leh hnam tana mi pawimawh takte hun hnunngah hian han sawi ve duh ka nei a. A hmasain Brig. T. Sailo, kan Chief Minister ropui tak ni thin uina thu sawi theia ka awm ve te pawh hi lawmawm ka ti a. Tin, Kanan veng pa ve ve kan nihna atangte pawh hian ka duty ni telte pawhin ka hre ve a. Amah vuina tur chungchang YMA leh chhungkhat lainate nen an sawihonaah te pawh veng a YMA hruaitute tawiawma ka'n tel ve theihna te kha Brig. T. Sailo ka thlahna atan chuan hlu tak a ni tih te min ngaihtuah let tir a.

Kan hotu kan House Leader leh Opposition Group Leader leh member puiten an sawi tawh zawng zawng kha tawmin Brig. T. Sailo chungchanga mi sawi ngailoh tak ka

sawilan duh a awm a. Faina ngaina em em leh thianghlimna ngainatu tak mai hi a ni a. Ka file hluite ka'n hai a, chuta ka thil haichhuah pakhtatah chuan Aijal Club-a 1981 kuma Nawhchizuar Lane siam chungchanga a chairman-na hnuaia kohhran hrang hrang hruaitute leh NGO hruaitute kan meeting tuma minute hi a saptawng leh a Mizo tawng chilh that hi ka lo la nei a. Chung kan haichhuah tukte chuan chumi min kaihhruai tuma a ngaihtuahna a sawichhuah te chu khami ni a ka tel lai ang mai khan ka rilruah a lo ri thar nawn leh a.

Hemi lo chhuahna chhan pawh hi Pu Speaker, sorkarna a kaihhruai lai khan Mizoram chu kan hriat angin rambuai a ni teh meuh mai a. Tin, chutih rualin central lam atangin Janata sokar an lo kal zut zut a. Tum khat chu George Fernandes, khatih hunlaia Industry Minister kha Aizawlah hian a lo kal a, Pu J. Thanghuama (tunah chuan ani pawh chatuan atan a lo chawl ta a) inah chuan Mizo Zirlai hruaituten kan va kawm tumin, Mizoram Janata hruaituten, "Atta Lane, (vawiina member thenkhat chuan khawngge Atta Lane a awm hre lo kan awm tawh hial awm e) tawp zia leh nangni zirlai hruaituten hma la teh u, ti a min lo rawn angin hma kan lak a ni a. Kan thil hmuh leh hriatte a kaihhruai sorkar-ah kan han thlen a. (Chutichuan, Education Minister chutih hunlaia Community Development Minister ni baw) hnenah mawhphurhna hlanin, tin, kohhran lamah pawh Rust Memorial Hall-a lawi Salvation Army thalai leh kohhrante nen tangkawpin chu Atta Lane chu thenfai hna thawh a ni a. Tuna Bungkawna Salvation Army headquarter hmuna sawn chung hmuna hmeichhe buan chaklo tam tak te chu a sorkar thiltihtheihna nen khan lakkhawm niin enkawl an ni a. Kohhranin thlarau thilin a chawm baw a. Chutiang chuan a sorkar kha kohhran nena tangdunin ti khan hmeichhe buan chaklo kan tih vawiina hmingthar vuah a han nih tak hialte lo chhuahna bul khang hun lai khan a ni a. Saw Atta Lane saw, tawng mawilo ni suh se, vawiinah Commercial Centre a ni ang tih khang hunlaia hre Chiangte chuan an ring pha lo ang tih ka ring a ni. Mahse Brig. T. Sailoa kaihhruai sorkar-in kohhran leh thalaite hman tangkai nachang a hriat avangin hmeichhe zawrhna hmun 50 lai mai a awm a, ka tel ve ngeina a nih avangin ka hrechiang a, faina te, thianghlimna te, an dinhmunte sukian ve tura theihpatawp a chhuah thinna te khan min tilawm ve em em a. Chungchu vawiin ah hian kan hotu dang zawng zawngten an sawi kha support bawkin amah ka hriat reng nan ka'n sawi duh a ni.

Pu Speaker, Pu Nghenga chungchanga ka'n sawi ve duh chu nichina kan hotute sawi ang khan, sap tawng thiam a nih hi zirlaiten an hre em em a, central lama memorandum thlen tur kan neih chuan, 'Pu Nghenga a awm alawm,' kan ti a. A hman remchan leh Aizawla a awm remchan chuan Mizo zirlaite hi kan thu thehluh turah hian, kan thu thehluh tur zia a mawi dawn a ni tih hi kan hmuh dan thin a ni a. Chumi chuan vawin ah min lo awm loh san ta a, Mizo zirlai zawng zawng amah Pu Nghenga hre chin tan chuan Pu Nghenga talent kha ramhnuaia hna a thawh lai leh a hun hmasa lam te hre pha lo mah ila Mizoram chhunga kan zirtirtu a nihna te, chumi hnua a thiamna te, a finna te Mizoram tan a thiamna leh a finna a inphalna zawng zawngte vawiinah hian he hnam hian hriatreng tlak niin ka hria a. Anmahni pahnih hi kan hnam tan

arsi eng mawi tak an ni a, an nuna zir tur thate kha keini Assembly member zawng zawngte pawhin kan theih ang anga kan chhonzawm atan ka duh em avangin i phalnain Pu Speaker, ka ui thu leh an chhung te, a nupui, an tu leh fate Pathianin awmpui se, nakinah thawhlehaah hlim leh lawm takin kan la inhmu leh ang tiin ka thlahna ka'n sawi ve a ni e, ka lawm e.

Pu LALRUATKIMA : Pu Speaker ka lawm e. Vawiinah kan ngaihthlak ang khan member zahawm tak lo ni thin Pu Thena leh Pu Nghenga te sunna huna thusawina ka nei thei hi vannei ka inti a. A bik takin Brig T. Sailo hi khawvel lam atang chuan ka pu a ni a, tichuan vengkhata awm kan ni a, ka bial mi nihna chen pawh a awm a, tin politic zawng han sawi pawhin kan House-a member zingah hian a hneh loh awmchhun ni pawhin ka inhria a, churang chuan vawiinah hian ka ui thu han sawi ve te pawh thain ka hria a.

Kan ngaihthlak tak ang khan, kan House Leader zahawm tak te, Opposition Group leader te leh kan member zahawm tak ten an sawi tawh avang khan tam ka sawi lo ang a. Kan hriat angin mithiam a ni a, matric a exam-te khan Mizovin harsa kan tih em em Mathematics leh Additional Mathematics leh Statistic-ah letter mark hmu phakin chutiang chuan mithiam a nihna alo lan tir tawh a. Tin, sipaia a tan pawhin Mizoten kan hria a, brigadier pahnih chiah kan nei a, Mizoten sipaiah dinhmun sang tak kan la chelh thei a ni tih hriain, Mizo thalaiten vawiin thleng hi chuan an dinhmun kan la luah phak lo a ni.

Politic chungchangah hian vision a neih that zia kan hria a, tin planning lamah a thiam a, a hmahlir thui zia hmuh hian thangtharten zirtur kan ngah hle a ni. Chutiang chuan Mizo politician zingah Padma Shri dawngthei hmasa ber ni te pawn a lang a, chutiang chuan hruaitu ropui tak mai sunna hun kan nei hi a lungchhiat thlak hlein ka hria a.

Tin, Brig T. Sailo hi mi inthlahrung tak mai ni hian ka hria a, ngaihdan erawh chu huaisen leh dik ni a a hriat chu sawi pawp mai chi a ni ve thung a. A hun hnunhngah khan inthenawm kan nih avang khan kan inlenpawh khawp mai a, a hun hnunhngah hman chungchangah pawh, 'ka boral hun chuan vuina hun minute 30 chhungin in lo zo tur a ni,' tiin an nu Pi Siami nena kan awm ho laiin min chah nghe nghe a, mahse, kan ti thei lo va, 'thlalak pawh vawi nga bak in la tur a ni lo,' te kha a ti a. Tin, 'chanchin ziahna a tul lo ve, midang kan tibuai a ni,' tiin chutiang te chuan thuchah te min nei thin a. Amaherawhchu, a hun hnunhngah khan khang zawng zawng kha kan ti thei lo va, a hun hnunhngah min chah chu hla pakhat ama hla duh em em, 'A saw raltiang tlangah tih kha lo sa ula min ti a,' a duh chhan te chiang takin min hrih vek a. Chutiang chuan hruaitu ropui tak ni mahse mi inthlahrung, mite tihbuai hlau tak hruaitu kan nei kha a vanneihthlak hlein ka hria a.

Tin, khatia khawvel a chhuahsan ta kha India ram chhunga Prime Minister-te, President te leh hruaitu ropui tak tak ten social media kaltlangin uina thu an rawn thawn a, chungte pawh chu kan hre vek awm e. Brig T. Sailo hi Mizote tan arsi lian niin ka hria a, a

lumennaah khan nula leh tlangvalte hmaah ka sawi tawh a, vanah khian arsi tam tak khawthian zanah chuan a awm thin a, amaherawhchu, chumi zingah chuan arsi engzual bik khi a awm thin a ni, chung arsi engzual bikah chuan Mizote tan chuan Brig T. Sailo hi a ni.

Vawiinah hian chu Mizote arsi chu lo chuai tain a taksa he leiah hian awm tawh lo mahse, a hnuhma, a vision te, a planning neih zawng zawngte hi thangtharten kan la entawn zel dawn a, kan chhui chho zel dawn a, Mizote rilruah hian a dai ngai dawn lo a ni tih hi ka sawi duh a.

Tin, a tawp bera ka sawi duh chu, veng ang pawn amaha zirchhuah kan neih chu, kan Y.M.A hruaituten ruahmanna fel tak an han siam a, a vuina ropui tak Zoram mipuite, Zoram mi langsar zawng zawng ten kim taka kan vui zawh khan YMA ten khawhar te kan len pui a, a tawp zanah Mizo inthuum a inthuum vek turin thalai hunrawn hmangtu zawng zawngte kha min ngen a, vawiin thleng khan chu chu kan la chhonzawm a ni. Veng hrang hrangte pawhin entawnin chutiang chuan ruahman te pawh anrawn nei chho zel a, hei hi Brig T. Sailo vang liau liau a ni tih kha ka han sawi duh a ni.

Tin, Pu Lalnghenga chungchang kha kan ngaithla a. A boral laiin kan awm lo va, mithiam a ni a, private-in lehkha a zir a, B.A. tha takin a passed a, saptawng a thiam dan zawng zawng te pawh kan hria a ni. Zirlai pawl hruaitu kan nih ve lai te pawhin memorandum kan han ziah tir thin kha a ni a, thu leh hla a thiam em em a, tawng a thiam baw a. Tin, zirna ngaisang mi, ram leh hnam vei mi a ni a. Aizawl North College dintute zing ami niin, Aizawl West College atangin senior lecturer-in a pension a ni. Vawiinah hian Pu Speaker, kan hruaitu ropui tak tak te, chatuan ram min pansan ta te hi kan hre reng a, an sulhnu an hnutchhiah hi thangtharten kan chhonzawm zel dawn a. An kalsan tak an chhungkua, an nupui fanau te, Pathianin thlamuanin awmpui zel se tih hi kan tawngtaina leh kan duhsakna a ni e. Ka lawm e.

*Speech not corrected.

SPEAKER : Awle, mi pahnih sunna, anmahni kan uina thu sawi dawn ila hun a duh rei viauin ka ring a. A bik takin Brig. T. Sailo phei hi chu 1978-79 atanga 1984 thlenga a Chief Minister hun kha hun khirh tak, ram buai lai a ni a, chuta a thusawi tun thlenga ka rilru a cham, thufing tak ni a ka hriat, khatih lai khan inhek tih te kha a tam duh khawp a, saptawng tawi te hian a phuah a, “forgive and forget”, “ngaidam la, theihnghilh rawh” a ti a. He thu hi thufing tak a niin ka hria a, amah kan sun niah hian he House hian chu chu hre tel ila a tha awm e. Tunah chuan ngawi rengin minute khat (1) anmahni pahnih sun nan i lo ding ang u. (Member-te ngawi rengin minute 1 an ding a.) I thu ang u le.

Thil dang kan tih leh hmain he House-a awm lo tura phalna min dilte kan zingah pathum (3) an awm a – Pu H. Zothangliana, Pu K. Sangthuama leh Pu Lalrinliana Sailo, heng mite hian he House-a awm loh phalna min dil a, kan phal sak a ni

tih he House hi ka han hriattir e. Tin, ni 23.6.2015-ah khan vawiina kan thut khawmna tur programme sheet siamna hi BAC-in kan nei bawk a. Chumi sheet chu member-te hnenah sem ni se.

Awle, Committee-in a lo rel tawh kha he House hian kan pawm a ni a, khatiang khan kan kal dawn a ni. Tunah hian kan programme-a tel lem lo, thil hmanhmawh thlak si a awm a, kan business a tel lo. Kan Home Minister zahawm tak Pu R. Lalzirliana'n inrukbo thu kha he House-ah hian sawi a duh a, Speaker-in kan dan 60-na hmangin a lo phal sak a. Tunah hian amah chu kidnap thu kha kimchang deuhin he House hi min hrilh turin i lo sawm ang.

Pu R. LALZIRLIANA, MINISTER : Pu Speaker, ka lawm e. July ni 4, 2015 zan dar 7:30pm vel khan, Aizawl veng laili takah, Babutlangah in kidnap-na a lo thleng a, hei hi vanduaithlak kan ti khawp mai a. Chutah chuan MD Akash Uddin, kum 30 mi, a pa MD Abdul Maniq, Bagha bazaar, Bagharpur, Karimganj district ami a ni a. Amah hi Zarkawta Pu Lalchhunga in luah a ni a, kuhva rah zuara eizawng thin a ni tih hriat a ni. Tichuan, Babutlang an inbul atangin Wagon R-ah a duh lo chung nawr lutin an hruai bo ta a. He thil thleng avang hian an hruai bo tak unaupa MD Haider Ali chuan Aizawl Police Station-ah FIR thehlutin, case register nghal a ni. Police ten theihtawp chhuah nghalin he thil thlenna hmun pawh hi rang taka thlen nghal a ni a. Aizawl khawpui chhung leh Mizoram hmun hrang hranga Police Station zawng zawngte pawh theihtawp chhuah a, anmahni bial chhung theuhah hma la nghal tura hriattir vek an ni. He thil thlenna bula private CCTV chu enfiah niin, misualte chet dan zawng zawng chu hmuh chhuah a ni a. Mi hruaibonaa inhnamhnawihte hi mi pali (4) niin, Wagon R hi MZ 01 G 3456 ti a vuah a ni a, he number hi a lem a ni tih hmuh chhuah nghal a ni a. Tichuan, heng misualte man tur leh an mi rukbote him taka chhan chhuak tur hian Police-ten chak taka hma la nghalin, kawng hrang hranga investigation kalpui a ni.

Ni 5.7.2015, Pathianni tlai lam dar 5:00 vel khan Lengpui khawtlang hruaitute atangin Sairang Police Station biak pawh a ni a. Misualten an rukbo ngei leh a rukbonaa inhnamhnawih ngei ni a an hriat an man thu an sawi a. Rang takin Sairang Police ten Lengpui an pan nghal a. Lengpui khawtlang hruaitute kut atangin an mi rukbo MD Akash Uddin leh a rubotute pahnih Thomson Lalbuatsaiha, Thomson Lalbuatsaiha hi self style captain invuah a ni a, amah hi kum 29, a pa C. Lalngaihawma, Venghnuai, Aizawl ami a ni. Nicky C. Zohmingliana, kum 29 hi self style sergeant invuah chawp a ni bawk a, a pa chu C. Ringzuala, Venghnuai, Aizawl a ni bawk a. He mite hi an la nghal a, an kut atang hian mobile phone, handcuff leh WT set, identity card leh thil dang engemaw zat man tel a ni bawk a. An mi rukbo hi Lengpui daia huan pakhat thlama an tawmpui laiin a tlan chhuak thei hlah a, khawtlang mipuite punin a rubotute hi man nghal an ni. Hemite hi Mizo Youth Service Corps invuah an ni a. Hei hi han chhui zau zel chuan NGO anga register niin an Director chu C. Dothanga, IPS retired a ni a. Hei hi

NGO anga register an nih hian sorkar leh mipuite dodal zawngin an che tur a ni lovang a, chuvangin an register pawh hi cancel theih a ni ang tih ka ring a.

Heng an mi man te leh an mi chhanchhuah te hi Aizawl Police Station rawn panpui nghalin thil tul apiang tih nghal niin, Dan ang thlapa man nghal an ni a. Tin, rukbo chhanchhuah tak pawh medical check up neih nghal a ni. Theih ang ang a thu zawhfiah nghal niin, mi hruaibonaa tel ve ngei Lallianmawia kum 32, a pa P.T. Kaia, Venghnuai, Aizawl pawh hi ni 5.7.2015 zan vek hian ama chenna in atangin Police-ten an man nghal a.

Tin, an zinga tel ve ngei Robert Lalmuanpuia, a pa K. Rozama pawh hi tunah hian a awmna chhui mek a ni a, ani hi la man loh a ni a. Ani hi Police constable-ah 2007 khan a tang a, 2013 khan invalid pension-a chhuah tir a ni.

Mi 3 man tak te hi Court-ah ni 6.7.2015 (nimin) khan hruai an ni a, police-in darkar 27 remand an dil angin Court-in remtih a ni a. Tunah hian Police custody-ah kawl zui zel a ni a. Engvanga hruai bo ta nge tih leh zawhna pawimawh dang te hrechiang tura thu zawhfiah tura la kawl mek an la ni tih Pu Speaker, he House zahawm takah hian ka'n sawi duh a ni e, ka lawm e.

SPEAKER : Tunah chuan Vote on Account, Budget 2015-2016 kan Finance Minister zahawm takin a pharh dawn a. Hei hi kan Governor-in India Dan-in a phal angin a rawn recommend a. Tunah hian kan Finance Minister zahawm tak Budget pharh turin i lo sawm ang.

Pu LALSAWTA, MINISTER : Pu Speaker, i remtihna leh kan Governor zahawm takin a recommend angin, he House zahawm takah kum 2015- 2016 chhunga Vote on Account pahnhna atan heng thla thum August, September, October thla chhunga sorkar lo hman lailawk tur he House-ah hian ka rawn pharh e.

Vote on Account hmasaa ka sawi tawh, chhan hrang hrangte avang khan tunah pawh hian theihtawp kan chhuah chungin regular budget kan pharh leh thei ta lo va, remchang hmasa berah regular budget hi pharh vat tum a ni ang. Sorkar laipua ministry hrang hrangte atangin Centrally Sponsored Schemes (CSS) a sorkar laipui leh state sorkarin sum an intum sem dan tur bithliah chiang fel fek fawk hriattirna kan la dawng lo va, hei hian regular budget min pharh tir theih loh phah ta a ni. Tin, Pu Speaker, 14th Finance Commission-in chhiah hrang hrang tlingkhawm atanga state sorkar chanvo tur chu za zelah sawmthum pahnih atangin sawmli pahnih-ah tisang bawh mahse, hmarchhak state ten special category status an neih thin chu tihtawp a lo nih tak avangin Mizoram chauh ni lo, hmarchhak state dangte pawhin

sum leh pai lamah harsatna lian tak an tawh phah ta a ni. A chhan bulpui ber pawh Centrally Sponsored Schemes hrang hranga state sorkarin a lo do let vena chu tihsan a lo nih tak vang a ni. Chuvang chuan keini ang state pachhe tan chuan a hmaa Centrally Sponsored Schemes kan lo kalpui ve tawh tawh thin te pawh engemaw zat chu kan kalpui zui thei lo maithei a ni.

Mizoram mai bakah hmarchhak State tangrual chuan sorkar laipui-ah he special category status hi tibo lova chawi nung leh turin kan ngen reng a, sorkar laipui atanga chhanna lawmawm tak kan beisei mek bawh a ni.

Heng bakah hian North Eastern Council (NEC) leh Ministry of Development of the North Eastern Region (DoNER) atanga kan sum hmuh tur zat hi kan la chiang thei lo cheu bawh a. Heng atanga kan sum hmuh thinte hi kan state plan sum zat tur hriltu an nih bawh si avangin tun tumah chuan Vote on Account pharh leh mai loh chu tih theih dang kan nei lo a ni.

Chutichuan Pu Speaker, i remtihna leh kan Governor zahawm takin a recommend angin Mizoram sorkarin kum 2015, August thla atanga October thla thlenga sum a lo hman lai lawk tur Vote on Account ₹ 18,23,81,44,000/- (cheng vaibelchhe sangkhat zariat sawmhnih pathum nuai sawmriat pakhat, singli leh sangli) chu he House zahawm takah hian ka pharh e. He House zahawm tak hian kan dinhmunte hrethiama min pawmpui ngei ka beisei. Ka lawm e.

SPEAKER : A copy kha member te hnenah sem ni se. Hmaih palh kan awm em ? Aw.. kan awm lo ve. Hemi session zawhah hian Legislative Forum on HIV & Aids meeting keimahni Annexe Hall-ah hian neih tur a ni a, member zawng zawngte kim taka kal tura sawm kan ni e.

Tunah chuan vawiina kan tih tur kan ti zo tawh a, kan chawl rih ang a, naktuk dar 10 : 30 ah kan kal khawm leh dawn nia.

Sitting adjourned 11 : 50 A.M.